


Renobacion di e Faro lo por dura seis luna cu inversion di 1 miyon florin



ORANJESTAD – E renobacion di E Faro den su estado original tabata un soño cu Monumenten Fonds tabatin pa varios aña.

Finalmente e lo por bira un realidad danki na e traspaso cu Gobierno a haci tres siman pasa di e monumento aki pa asina e fundacion menciona por canalisa e fondonan necesario pa cuminsa cu e trabou di renobacion proximamente. Net e proceso aki ta bay start e aña aki cu e Faro ta celebra su 100 aña di existencia.

Bon Dia Aruba a sostene un entrevista cu e directora di Monumenten Fonds, sra. Ir. Anne Witsenburg y e lider di e proyecto, sr. Joost Saris, kende a mustra nos e Master Plan cu nan a yega di traha dos aña pasa relaciona cu e rescate di E Faro. Pero recientemente nan a realisa un di dos inspeccion y E Faro su estructura ta hopi mas deteriora cu 24 luna pasa. E tin parti di e trapi cu ta frustia, tambe tin likimento di awa, y varios dañonan den dje. Apesar di esey ainda como un fiel trahado, e ta realisa su trabou di ilumina tur anochi e ruta



di e barconan cu ta nabega cerca di nos costanan.

Elementonan importante
Sra. Witsenburg ora cu el a

yega Aruba practicamente a namora di E Faro. E ta haya cu E Faro tin elementonan importante di nos cultura material y inmaterial envolvi den dje. Di un banda e ta un icono di Aruba y practicamente tur nos bishitante ta bay cu un potret di E Faro como recuerdo.

Ademas -segun sra. Witsenburg- e Faro na West Punt ta e unico den su genero arkitektonico. El a yega bishita varios faro den nos region specialmente esunnan na Bonaire, y e ta descubri cu esun di nos ta excepcional. Otro elemento importante cu e ta haya ta e historia cu tin tras di E Faro. E tin asina tanto historia cu a bira un fuente rico di inspiracion pa meneer Romulo Fingal cu a yega di skirbi un buki di dje. Sr. Fingal ta yiu di e ultimo cuidado di e toren, yama tambe "California Lighthouse".

Un otro aspecto y no menos

importante ta e sitio unda E Faro a ser construi pa mustra su splendor. E ta señala cu e sitio aki tin "un magia".

Fondo y construccion

Sra. Sra. Witsenburg a informa cu nan tin fondo disponible pa inverti den e trabou di renobacion di e monumento aki. Sinembargo nan ta wardando cu e proceso legal di traspaso di E Faro ta cla, ya cu esaki ta un requisito fundamental pa tin acceso na e fondo. Unabes cu esaki ta cla, nan lo cuminsa cu e trabou aki prome cu fin di aña. Nan ta calcula cu unabes cu e trabou ta cuminsa, esaki lo tarda entre 5 pa 6 luna pa bin cla, si tur cos ta bay bon y sin inconveniente.

E lider di e proyecto, sr. Joost Saris a laga sa na Bon Dia Aruba cu un proyecto asina ta demanda hopi atencion, ya cu nan mester a traha un plan, tambe nan mester atende cu e parti financiero di e proyecto. Considerando cu E Faro a deteriora mas durante e ultimo dos añanan lo mester inverti mas placa. Monumenten Fonds ta calcula cu e inversion lo ta alrededor di 1 miyon florin.

Un aspecto cu nan mester tin cuenta ta cu durante e proceso arkitektonico di cirugía plastico pa e Faro por haya su hubentud bek, e lo sigui funciona. Kiermen su luz lo sigui ilumina e ruta di e nabegantenan.

Continúa riba Pagina 7



Continuacion di Pagina 6

Master Plan

Desde di dos aña pasa Monumenten Fonds a traha un Master Plan completo pa presenta na Gobierno y tur instancia envolvi cu e monumento aki, entre nan APA, considerando cu e ta un faro y un instrumento importante di nabegacion.

E tempo aya nan a realisa un evaluacion di e condicion di E Faro y te hasta hunto cu DOW a logra di crea cierto proteccion y siguridat pa e monumento, pero rond di dje tambe pa e bishitantenan. E tabata den un estado malo, pero dos aña a pasa y no tabatin mantencion y e situacion di e Faro a bira pio, pues e inversion lo bira mas grandi. E master plan presenta na gobierno e tempo haya tabata hopi ambicioso den e bon sinti di palabra. Nan kier recupera e cas di e cuidado di Faro cu awor tin un restaurant den dje y duna e edificio su balor historico cu e tabatin. Ademas nan tabata kier establece e ruta cu e cuidado di e Faro tabata cana normalmente for di e casita te e Faro pa realisa nan trabou di mantene e luz cendi cu antes tabata traha cu zeta y despues cu coriente.

Igualmente nan tabata kier salvaguardia e luga contra e presion di tanto vehiculo di motor y crea facilidad pa estaciona nan. Tambe nan kier a crea un ruta di acceso ya sea canando of cu bicicleta pa yega te na e Faro.

Ademas den e master plan inicial nan tabatin pensa di construi strategicamente cerca di e Faro varios paviljoen duradero cu facilidad pa vende souvenir di e Faro, awa, y tambe facilidad di baño.

Renobacion

Despues cu a ser analisa e master plan a bin cu un cambio di plan. Gobierno ta considera cu e plan nobo aki lo

envolve solamente E Faro su renobacion y un area chikito rond di dje.

Tambe Monumenten Fonds a pensa riba facilita acceso pa asina e bishitante por conoce E Faro paden y disfruta di e bunita bista panoramico di Aruba cu su altura ta ofrece. Lo bin cu un waya special di siguridat cu sin afecta e bunitesa di E Faro, e bishitante por saca potret ariba cu siguridat absoluto. Monumenten Fonds tin pensa di cobra algo den forma di contribucion pa esunnan cu kier drenta paden di E Faro. Lo wordo crea grupo di 10 bishitante cu e presencia di un guia. Nan ta calcula cu lo haya un total di 80 bishitante pa dia. E fondo aki lo yuda pa mantencion di e mesun monumento aki. Un atraccion lo ta e luz original di E Faro cu Fundacion Rancho tin'e y Monumenten Fonds lo kier restaura e luz aki na Hulanda ya cu e tin un parti mecanico cune.

Historia

California Lighthouse of manera conoci pa pueblo e Faro na West Punt ta cumpliendo 100 aña di existencia. E construccion mes di E Faro a cuminsa na 1914 y a tuma 2 aña pa caba e trabou, ya cu a cende su luz pa prome biaha na aña 1916.

El a wordo construi di piedra den forma di ocho banda y un altura di 30 meter y ta ubica cerca di e beach di Arashi. El a haya su nomber debi na e barco Mericano yama California cu a sink na september 23 di 1891 cerca di e sitio unda e monumento aki a wordo lanta.

Dos decada despues un arkiecto Frances a traha e diseño di e toren aki. El a wordo construi cu piedranan di calichi haya den e cercania mes y su parti ariba a wordo construi di metal cu awor ta completamente frustia y den condicion deplorable y peligroso. □

